



bazë të Vendimit nr. 332, datë 04.05.2016 të Këshillit të Ministrave “Për organizimin dhe funksionimin e Qendrës Kombëtare Pritëse për Azilkërkuesit”, me qëllim strehimin e të huajve, që kërkojnë azil në Republikën e Shqipërisë.

Qendra Kombëtare Pritëse është e vetmja në territorin e Republikës së Shqipërisë ku akomodohen dhe trajtohen shtetas të huaj, që kërkojnë mbrojtje në Shqipëri. Në këtë qendër strehohen azilkërkuesit pas paraqitjes së kërkesës për azil, si dhe personat të cilëve iu është refuzuar aplikimi për azil, deri në përfundim të procedurave të ankimimit apo afatet për ushtrimin e tyre. QKPA-ja<sup>1</sup> ka buxhetin e vet, i cili është pjesë e buxhetit të Ministrisë së Brendshme, që mbulon çështjet e azilit dhe refugjatëve. Azilkërkuesit janë subjekte përfitimi të strehimit, ushqimit dhe të ndihmës financiare për nevoja emergjente vetjake, që ofron kjo Qendër, si dhe të ndihmave humanitare, të cilat jepen nga persona fizikë ose juridikë, shqiptarë ose të huaj. Mënyra dhe kriteret e përfitimit të strehimit, të ushqimit dhe të ndihmës financiare e humanitare si dhe masat e këtyre ndihmave, bazuar në pikën 6, Kreu I, dhe pikën 5, Kreu III të Vendimit të Këshillit të Ministrave Nr. 332, datë 04.05.2016, “Për organizimin dhe funksionimin e Qendrës Kombëtare Pritëse për azilkërkuesit, përcaktohen me udhëzim të Ministrit të Brendshëm”.

Pranimi i azilkërkuesve dhe personave të tjerë që gëzojnë mbrojtje në bazë të legjislacionit ndërkombëtar dhe kombëtar, bëhet me akt-pranimi (akt dorëzimi) të nënshkruar nga personi i autorizuar i Drejtorisë Vendore për Kufirin dhe Migracionin ose Policisë së Shtetit dhe një prej specialistëve të Qendrës. Një kopje e akt-pranimit (akt dorëzimit) ruhet në zyrën e protokoll-arkivës. Pas pranimit të azilkërkuesit, sektori i mbështetjes së azilantëve në bashkëpunim me sektorin e financës dhe mbështetjes me shërbime, harton planin e masave për akomodimin dhe përgatitjen e ambienteve, ku do të strehohen azilkërkuesit. Kjo Qendër ofron strehimin e azilkërkuesve, kujdesin për shërbimin shëndetësor, sigurinë e tyre, ushqimin, veshmbathjen dhe plotësimin e të gjithë nevojave jetike.

*Struktura e Qendrës Pritëse të Azilkërkuesve Babrru përbëhet nga 2 sektorë:*

- Sektori i mbështetjes së Azilantëve i cili përbëhet nga (3 punonjës).
- Sektori i Financës dhe shërbimeve mbështetëse i cili përbëhet nga (11 punonjës).

Në përputhje me procedurën e inspektimit, grupi i monitorimit u takua me drejtuesin e këtij institucioni z. Ermir Aliçka, të cilit iu bë me dije metodologjia dhe qëllimi i inspektimit. Nga ana e drejtuesit të institucionit u ofrua mundësia që të kishin akses në përputhje me rregulloren dhe pa vështirësi në të. Gjatë takimit, grupi i punës kërkoi fillimisht informacion në lidhje me mënyrën e trajtimit të personave në qendër dhe respektimin e të drejtave të azilkërkuesve.

Grupi inspektues përgjatë inspektimit verifikoi edhe masat e marra për parandalimin e përhapjes së Covid-19, ndonëse institucioni i Avokatit të Popullit ka qenë në kontakt të vazhdueshëm me Qendrën për marrjen e informacionit për masat e marra për të përballuar këtë situatë edhe më parë.

Me qëllim parandalimin e përhapjes së infeksionit të shkaktuar nga COVID-19, QKPA kishte marrë disa masa si për punonjësit ashtu edhe për shtetasit e parregullt të huaj të akomoduar në Qendër. Qendra iu kishte mundësuar të gjithë punonjësve maska mbrojtëse, doreza dhe dezinfektues me bazë alkooli. Po ashtu në bashkëpunim me Bashkinë Kamëz,

---

<sup>1</sup> Në zbatim të nenin 44, të ligjit nr.10/2021 “Për Azilin në Republikën e Shqipërisë”, si dhe në zbatim të vendimit nr. 322, datë 4.5.2016 të Këshillit të Ministrave “Për organizimin dhe funksionimin e qendrës kombëtare pritëse për azilkërkuesit”

kishte realizuar dezinfektim të mjediseve të QKPA-së çdo muaj në mënyrë periodike, si dhe çdo herë pas largimit të grupeve. Azilkërkuesve u janë treguar masat që duhet të merrnin me qëllim parandalimin e përhapjes së sëmundjes. Kjo ishte shpjeguar si nëpërmjet komunikimit, e cila ishte bërë në gjuhën angleze po ashtu edhe nëpërmjet posterave të vendosur në Qendër (ku këto ishin bërë në gjuhën angleze, arabe, farsi dhe në pashtu), se si të lajnë duart, si të tregojnë kujdes në rastet kur kolliten apo teshtijnë. Po ashtu këtyre të fundit u janë siguruar dezinfektant, alkool për dezinfektimin e duarve. Deri në ditën e inspektimit asnjë nga azilkërkuesit nuk kishin shprehur shqetësim për shfaqjen e simptomave të COVID-19.

Nga informacioni i grumbulluar në vend, nga kontakti me stafin e institucionit si dhe nga këqyrja e dokumentacionit, e objekteve dhe mjediseve, rezultoi se rekomandimet e lëna nga Avokati i Popullit pas inspektimit të bërë në vitin 2020, nuk kanë gjetur zbatim si më poshtë:

**Organika dhe struktura.** Struktura aktuale sjell pengesa në mbarëvajtjen e punëve, ndarjen e detyrave dhe funksionimin në tërësi. Përveç vështirësive në funksionimin e dy sektorëve, shqetësuese mbetet mungesa e pozicioneve për institucionin si infermier, mirëmbajtës, mjek dhe kujdestar nate. Gjatë periudhës Janar – Qershor ky institucion ka pritur 27 azilkërkues.

- Kuota ditore ushqimore ka mbetur e pandryshuar dhe vazhdon të jetë tejet e ulët dhe e pamjaftueshme duke mos iu përgjigjur nevojave normale për ushqim. Përcaktimi i normativave të trajtimit me ushqim të azilkërkuesve është tepër e rëndësishme pasi grup moshat e paraqitura në qendër janë të moshave të ndryshme, të cilët jo rrallëherë paraqiten në kushte jo të mira fizike.
- Në institucion vazhdon të kishte mungesë të **mjekut të përgjithshëm**. Duke qenë se në QKPA akomodohen grup moshë (fëmijë të mitur e deri dhe në moshën e tretë), për shkak të origjinës nga vijnë, mbartin kultura të ndryshme, persona vulnerabël, që kanë probleme shëndetësore kronike e deri në më të rëndat, institucioni nuk mundet të ofrojë një shërbim të kualifikuar të ndihmës së parë. **Shtimi i personelit me një mjek të përgjithshëm është tejet i domosdoshëm.**
- **Infermieri** në Qendër ofrohet nga RMSA-ja “*Qendra e Shërbimeve Shqiptare për Refugjatë dhe Migrantë*”. Mungesa e një infermieri të përhershëm në Qendër krijon probleme në emergjencat e krijuara dhe cënon ndjeshëm ofrimin e shërbimit ndaj personave të huaj të strehuar.
- **Shërbimi stomatologjik në QKPA nuk ofrohet nga Qendra.**
- **Kujdestar nate** nevojiten dy persona referuar faktit se kjo është një qendër e hapur, në të cilën shërbimet ofrohen 24/24. Në orët e natës nevojitet për të qenë prezent në institucion.
- **Qendra ka vetëm 1 sanitare**, si rezultat i shtimit të numrit të azilantëve dhe fluksit i cili ndryshon çdo muaj dhe është i paparashikueshëm nevojitet shërbimi sanitar me dy turne.
- **Në institucion vazhdon të mos të ketë mirëmbajtës.** Mungesa ka krijuar probleme të vazhdueshme në institucion, për mirëmbajtjen e pajisjeve në lavanteri, dhomat e dusheve, në ambientet e përbashkëta ( sallë interneti, bibliotekë, mensë dhe kuzhinë).

Nga këqyrja e dokumentacionit vërehej se gjatë vitit 2020 në QKPA, numri i azilkërkuesve ka ardhur gjithnjë në rritje për shkak të situatave në rajon dhe më gjerë, ku

janë pritur dhe akomoduar në total **2189 azilkërkues** nga të cilët 1682 të rritur (319 gra dhe 1363 burra) dhe 507 të mitur (173 vajza dhe 334 djem). Ndërkohë që gjatë periudhës 2018-2020 janë akomoduar në QKPA 13260 azilkërkues, nga të cilët **4371 në vitin 2018, 6700 në vitin 2019 dhe 2189 në vitin 2020**. Kapaciteti zyrtar i kësaj Qendre është **180 persona**. Në mjediset e institucionit në kohën e inspektimit ndodheshin **4** persona, të gjithë meshkuj të rritur, 2 (dy) të shtetësisë kosovare, 1 (një) i shtetësisë turke dhe 1 (një) i shtetësisë rus

Rritja e fluksit nuk është shoqëruar me rritjen e kapaciteteve të stafit mbështetës. Nga biseda me drejtuesin e institucionit grupi i inspektimit u informua se për shkak të situatës së krijuar nga fluksi i vitit të kaluar ambientet e banimit kanë pësuar dëme të konsiderueshme materiale si dhe të strukturës së godinave duke i nxjerrë jashtë funksionit të tyre, kjo dhe për shkak se ndërmyet azilkërkuesve kishte konflikte të mbartura prej nga vinin dhe sistemimi i tyre në ambientet e akomodimit i vinte në vështirësi. Situatat agraronin deri në ndërhyrje nga ana e institucionit. Më konkretisht godina 4 (katër) katëshe dhe godinat 1 (një) katëshe nr. 3 dhe nr. 4 kanë pësuar dëme të konsiderueshme. Për këtë arsye QKPA nëpërmjet shkresës me nr. 136 prot., datë 17.05.2021, i është drejtuar Ministrisë së Brendshme duke kërkuar rikonstrukcionin e këtyre godinave të cilat kërkojnë adresim të menjëhershëm në mënyrë që të sigurohet mirëfunksionimi i tyre dhe të bëhet i mundur plotësimi i nevojave të azilkërkuesve për të jetuar në Qendër në kushte të përshtatshme bazuar edhe në aktet ndërkombëtare dhe legjislacionin në fuqi për t'ju siguruar atyre trajtim njerëzor.

### ***Trajtimi***

Gjatë vizitës monitoruese, grupi inspektues mori kontakt me pjesën më të madhe të azilkërkuesve që gjendeshin në qendër dhe bisedoi me ta në mënyrë konfidenciale. Nga bisedat e kryera nuk rezultoi që ndaj tyre të ishte ushtruar dhunë fizike apo psikologjike nga personeli i Qendrës.

Azilkërkuesit, të cilët dyshohet se mund të kenë qenë viktimat të torturës deri në momentin e mbërritjes në institucion apo akteve të tjera të rënda të dhunës, qoftë kjo seksuale, fizike apo psikologjike, i krijohen mundësitë për këshillim dhe/ose trajtim të veçantë mjekësor dhe psikologjik.

Për çdo rast vlerësohet gjendja e tyre nga punonjësit e Sektorit të Mbështetjes së Azilantëve, e më pas shihet mundësia që rasti të trajtohet brenda ambienteve të QKPA (Qendra Kombëtare Pritëse të Azilkërkuesve) apo të referohet në instanca më të specializuara.

### ***Masat mbrojtëse***

Personat e akomoduar në Qendrën Kombëtare Pritëse të Azilkërkuesve që u intervistuan nga grupi i inspektimit, pohuan se mund të dilnin nga institucioni dhe se mund të zhvillonin aktivitetet e tyre personale pa probleme, duke gjetur mbështetje nga stafi i Qendrës.

Sa i përket çështjes së sigurisë, në mesin e re të Qendrës Kombëtare Pritëse të Azilkërkuesve ishte i instaluar sistemi i monitorimit me kamera në mjediset e përbashkëta, por jo në ato të banimit për të ruajtur privatësinë e tyre. Siguria e ambienteve të Qendrës bëhej nëpërmjet një kompanie të shërbimit privat të sigurisë fizike. Sistemi i kamerave monitorohej nga punonjësi i sigurisë.

Për shtetasit e huaj të pranuar, QKPA siguron shërbimet e mëposhtme sipas një plani të detajuar 1-mujor:

- Akomodim dhe strehim të përshtatshëm në varësi të gjendjes familjare të të huajit si dhe kushteve të strehimit
- Ushqim të gatuar dhe ambiente të përshtatshme e bashkëkohore në mensë të përbashkët.
- Materiale të ndryshme higjieno-sanitare për higjienë personale.
- Trajtim psikologjik nga specialistët e fushës.
- Trajtim shëndetësor në qendra shëndetësore shtetërore ose private (në bashkëpunim me partnerët ndërkombëtare).
- Konsulencë juridike mbi legjislacionin e brendshëm dhe atë ndërkombëtar për personat që gëzojnë mbrojtje ndërkombëtare.
- Ofrohet biblioteka, salla e lojërave, shërbim interneti.
- Për fëmijët ambient i veçantë i pajisur me bibliotekë dhe lojëra të ndryshme sipas grup moshave.

Qendra kishte një rregullore të re, të miratuar në mbështetje të ligjit nr. 10/2021 “Për Azilin në Republikën e Shqipërisë”.

### ***Kushtet materiale***

Struktura e kësaj Qendre përbëhej nga: një godinë 4 (katër) katëshe dhe 5 (pesë) godina njëkatëshe e ndërtuar nga donatori UNHCR me fonde të BE-së, e cila kryen disa funksione: në katin e parë është kuzhina bashkë me ambientin e mensës dhe dy tualete, lavanderia, infermiera, dhoma e personave me aftësi të kufizuara, salla e kamerave të sigurisë.

Në katin e dytë janë vendosur salla e internetit, biblioteka, dhoma e fëmijëve për orët argëtuese dhe edukative, gjithashtu, po në këtë kat ndodhet edhe dhoma e akomodimit për azilkërkuesit, në katin e tretë dhe të katërt ato janë të pajisura me tualete për të gjitha ambientet, me sistem ngrohjeje dhe ftohjeje, ujë të ngrohtë 24 orë. Godina një katëshe janë 5 (pesë), 3 (tre) godina janë ambiente akomoduese dhe me tualetet përkatëse, me sistem ngrohje dhe ftohje, me ujë të ngrohtë njëzet e katër orë, 1 (një sallë) pritjeje dhe intervistimi në momentin e mbërritjes të azilkërkuesve, 2 (dy) godina të tjera, janë zyra për administratën dhe ambiente ndihmëse për administrimin e Qendrës (magazina).

Qendra menaxhohej me fondet e buxhetit të shtetit, ndërsa pajisjet dhe gjithçka tjetër mbi arredimin, ishin mbuluar nga donacionet e UNCHR-së. Nga këqyrja e ambienteve grupi inspektues konstatoi se në qendër nuk kishte ende një kënd lojërash për fëmijët. Po ashtu edhe fusha sportive paraqitej jo e përshtatshme për kryerjen e aktiviteteve sportive.

Lavanderia ishte në kushte shumë të mira e cila kishte 5 lavatriçe, si dhe pranë saj shërbente sanitarja e Qendrës. Kuzhina ishte e pastër, kishte mjaftueshëm tavolina dhe karrige për azilkërkuesit. Punonjëset e saj ishin të pajisura me libreza dhe kushtet higjienike ishin të mira, menyja e përditshme ishte e afishuar.

Për të rriturit ofroheshin 3 vakte në ditë, ndërsa për fëmijët 4 vakte. Kampionët ushqimorë ruheshin në një ambient frigoriferik. Sikurse u konstatua në vend nga grupi i inspektimit, edhe nga intervistat e bëra me azilantët e akomoduar në qendër, ushqimi ishte i një cilësie të mirë, por i pamjaftueshëm.

Në katet e sipërme të godinës së re, mjediset e banimit ishin të strukturuar në dhoma të mëdha, të pajisura me tualete dhe me dush brenda. Në ambientet e Qendrës kishte gjithashtu edhe Wi-Fi.

Dhomat e banuara kishin dritë natyrale dhe artificiale dhe ishin të pajisura me orënditë e nevojshme të reja. Sistemi i ngrohjes së ujit të Qendrës kryhej përmes paneleve diellore. Në përgjithësi, në të gjitha intervistat e kryera, grupi i inspektimit konstatoi se nuk kishte mungesa në furnizimin e azilkërkuesve me shtroje, mjete të tjera të higjienës personale dhe asaj të përbashkët.

Furnizimi me ujë të rrjedhshëm ishte pa kufizim oraresh dhe nuk u konstatuan probleme me energjinë elektrike. Për këtë të fundit kishte edhe një gjenerator në raste ndërprerje të energjisë.

Qendra ka patur një fluks të madh azilkërkuesish dhe për këtë fakt shumë nga dyert, dritaret, mobiliet etj. kishin pësuar dëmtime të konsiderueshme. Nga biseda me drejtuesin e institucionit u informuam se institucioni kishte pasur donacion nga “Caritas Albania” për rikonstruksionin dhe mobilimin e njëres prej godinave 1 (një) katëshe, ku kushtet për jetesë në to ishin optimale.

**Ritheksojmë se Qendra ka nevojë emergjente për mbështetje në staf dhe në mirëmbajtje, pasi burimet financiare, si dhe njerëzore i ka të kufizuara, çka e bëjnë të pamundur përbashkëtimin e situatave, kur ka mbipopullim e cila ndikon drejtpërdrejt në shkelje të të drejtave të azilkërkues të huaj.**

#### *Aktivitetet*

Nisur nga fakti se Qendra është e hapur, personat e strehuar në të ishin të lirë të punonin, të dilnin nga Qendra, apo edhe të kryenin aktivitete të tjera personale. Grupi inspektues verifikoi se edhe përgjatë periudhës 6 mujore janar-qershor nga verifikimi i dokumentacionit të hyrjeve dhe daljeve ata kanë qenë të lirë për të dalë jashtë Qendrës.

Kjo qendër kishte nënshkruar një marrëveshje me Ministrinë e Arsimit lidhur me mundësinë e arsimimit 9-vjeçar të fëmijëve të strehuar në këtë qendër. Në ditën e inspektimit nuk kishte fëmijë të akomoduar, por duhet theksuar se situata e mbylljes së përkohshme, krijuar nga pandemia Covid-19, kishte sjellë pezullimin e procesit mësimor.

Biblioteka funksiononte dhe kishte një numër të konsiderueshëm librash. Tërheqja dhe kthimi i librave bëhej duke shënuar të dhënat përkatëse në një kartelë personale. Gjithashtu, kishte edhe një ambient të përbashkët për ndjekjen e programeve televizive.

Gjatë këqyrjes së dokumentacionit, grupi i inspektimit konstatoi se stafi i Qendrës mbante regjistrin elektronik themeltar për të gjithë personat e strehuar në qendër, si dhe regjistrin themeltar të sekretuar. Secili prej tyre kishte një dosje specifike me të gjithë dokumentacionin e duhur dhe zhvilloheshin takime të veçanta nga stafi psiko-social me ta.

Për regjistrimin e azilkërkuesve përdoren këto mënyra, data-basë e azilit, regjistri elektronik (në formatin excel) dhe regjistri i sekretuar. Regjistri i azilkërkuesve mban të dhënat demografike të azilkërkuesve të akomoduar. Sektori i mbështetjes së azilkërkuesve bën regjistrimin e azilkërkuesve nga regjistri në formë elektronike dhe regjistri i sekretuar. Sektori i mbështetjes së azilantëve bën përditësimin e të dhënave.

Duhet theksuar se aktiviteti social në Qendër me qëllim rehabilitimin, argëtimin dhe zbavitje, ishte i limituar për shkak të numrit të lartë të azilkërkuesve prej muajit janar dhe situatës së krijuar nga pandemia Covid-19 në vend muaji mars, sektori social kishte zhvilluar vetëm sesione informuese për masat anti covid dhe informacionin e nevojshëm me qëllim parandalimin e sëmundjes.

### ***Shërbimi shëndetësor***

**Organika e Qendrës kishte mungesa në mjek të përgjithshëm me kohë të plotë dhe një kujdestar nate.** Me rikonstrukcionin e mjediseve të Qendrës, ishte parashikuar një dhomë e veçantë për mjekun me të gjitha pajisjet e duhura. Nuk kishte mungesa në furnizimin me medikamente.

Mungesa e mjekut në institucion ka krijuar një situatë jo të favorshme në ofrimin e kujdesit shëndetësor ndaj personave të huaj të cilët paraqiten në institucion. Këta persona jo rrallë herë paraqiten me nevoja të theksuara për kujdes shëndetësor, pasi ata vijnë nga një rrugëtim i gjatë dhe i mundimshëm.

Nëpërmjet shkresës me nr. 123 prot., datë 05.05.2021, QKPA i është drejtuar Ministrisë së Brendshme duke propozuar ndryshime në strukturën organike të QKPA-së në mënyrë për të përmbushur nevojat e kësaj qendre. Duke qenë se gjatë periudhës 2018-2020 janë akomoduar në QKPA 13260 azilkërkues, nga të cilët 4371 në vitin 2018, 6700 në vitin 2019 dhe 2189 në vitin 2020. Duke mbajtur në konsideratë këto statistika është e domosdoshme rishikimi i strukturës organike të këtij institucioni për arsye se ky fluks azilkërkues ka sjellë vështirësi në mbarëvajtjen e punëve në institucion. Për këtë arsye QKPA i ka propozuar Ministrisë së Brendshme shtimin e organikës me 6 persona nga të cilët:

- 1 infermier;
- 2 kujdestarë nate;
- 1 punëtor mirëmbajtjeje;
- 1 specialist finance;
- 1 sanitare.

Institucioni nuk kishte një autoambulancë, por në raste emergjence përdorëshin makinat e Qendrës për transportimin e azilkërkuesve pranë qendrave spitalore.

Gjithashtu librezat shëndetësore ishin të hapura për të gjithë azilkërkuesit e akomoduar në qendër, dhe skema e rimbursimit të ilaçeve ishte në funksion të plotë. Medikamentet mjekësore të rimbursueshme përfitoreshin me të njëjtën praktikë si shtetasit e tjerë të Republikës së Shqipërisë, në rastin konkret nga fondet e Qendrës. Ndërsa medikamentet mjekësore të parimbursueshme bliheshin sipas procedurave të prokurimit publik.

*Për sa më sipër, në mbështetje të pikës 3, të nenit, 63 të Kushtetutës së Republikës së Shqipërisë ku thuhet se: “Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike”; të nenit 21, germa “b” të ligjit nr. 8454 datë. 04.02.1999 “Për Avokatin e Popullit”, i ndryshuar, ku thuhet se: “Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive; si dhe në bazë të nenit 81 pika 2/b të ligjit nr. 81/2020 “Për të drejtat dhe trajtimin e të dënuarve me burgim dhe të paraburgosurve” ku parashikohet midis të tjerash se: “2. Në funksion të zbatimit të këtij ligji, mekanizmi kombëtar ushtron këto kompetenca: b) paraqet rekomandime për organet përkatëse, me qëllim që të*

*përmirësohen trajtimi dhe kushtet e individëve që u është hequr liria dhe të parandalohet tortura, trajtimi ose dënimi i egër, çnjerëzor ose poshtërues”.*

### **REKOMANDOJMË :**

1. Marrjen e masave të menjëhershme për rritjen e kuotës ditore të trajtimit me ushqim të azilkërkuesve, duke marrë parasysh rritjen e çmimeve të shportës së ushqimeve si dhe vlerësimin e tyre vit pas viti.
2. Marrjen e masave të menjëhershme për rishikimin e organikës së kësaj Qendre duke pasur në vëmendje trendin e lëvizjeve migratore. Vlerësimin për shtimin e organikës me të paktën 1 infermier, 2 kujdestarë nate, 1 punëtor mirëmbajtjeje, 1 specialist finance dhe 1 sanitare të cilët janë të domosdoshëm për plotësimin e nevojave aktuale.
3. Marrjen e masave për rikonstruksionin e godinës 4 (katër) katëshe dhe godinave 1 (një) katëshe nr. 3 dhe nr. 4, për të bërë të mundur krijimin e kushteve normale për jetesën e këtyre personave.
4. Marrjen e masave për krijimin e një këndi lojërash për fëmijët dhe një fushë sportive të përshtatshme për kryerjen e aktiviteteve sportive.

Për qëndrimin dhe masat që do të merrni në zbatim të këtij rekomandimi, të vihemi në dijeni brenda afatit 30 ditor sipas nenit 22 të Ligjit Nr. 8454 dt. 04.02.1999 “Për Avokatin e Popullit”, i ndryshuar.

*Duke besuar në mirëkuptimin dhe bashkëpunimin tuaj.*

**KOMISIONER**

**ERMONELA XHAFA**

Konc.: G. Çarkaxhiu  
N. Qafzezi  
H.Selita